



საქართველოს უზენაესი სასამართლო განჩინება

საქართველოს სახელით
საკასაციო საჩივრის დასაშვებობის
შემოწმების შესახებ

№654აპ-18
თბილისი

ქ.

ს-----ი ზ-----, 654აპ-18

18 აპრილი, 2019 წელი

საქართველოს უზენაესი სასამართლოს სისხლის სამართლის
საქმეთა პალატამ შემდეგი შემადგენლობით:
გიორგი შავლიაშვილი (თავმჯდომარე),
ბესარიონ ალავეიძე, პ----- ქათამაძე

ზეპირი მოსმენის გარეშე შეამოწმა თბილისის სააპელაციო სასამართლოს სისხლის სამართლის საქმეთა პალატის 2018 წლის 7 სექტემბრის განაჩენზე მსჯავრდებულ ზ----- ს-----ის ინტერესების დამცველის, ადვოკატ ქ----- გ-----ის საკასაციო საჩივრის დასაშვებობის საკითხი და

გ ა მ ო ა რ კ ვ ი ა :

1. გორის რაიონული სასამართლოს 2018 წლის 23 მაისის განაჩენით ზ----- ს-----ი, – დ-----ს, ნასამართლობის არმქონე, – ცნობილ იქნა დამნაშავედ საქართველოს სსკ-ის 126¹-ე მუხლის მე-2 ნაწილის „ბ“ ქვეპუნქტით, 126¹-ე მუხლის მე-2 ნაწილის „ა“ ქვეპუნქტით (2018 წლის 1 იანვრამდე მოქმედი რედაქცია) და მიესაჯა 1-1 წლით თავისუფლების აღკვეთა. საქართველოს სსკ-ის 59-ე მუხლის მე-2 ნაწილის თანახმად, ერთმა სასჯელმა შთანთქა მეორე და საბოლოოდ, დანაშაულთა ერთობლიობით ზ. ს-----ს განესაზღვრა 1 წლით თავისუფლების აღკვეთა, რომლის მოხდა დაეწყო დაკავების დღიდან – 2017 წლის 20 ნოემბრიდან.

2. პირველი ინსტანციის სასამართლომ განაჩენით დადგენილად მიიჩნია,

რომ ზ----- ს-----მა ჩაიდინა ოჯახის ერთი წევრის მიერ მეორის მიმართ ძალადობა, რამაც გამოიწვია ფიზიკური ტკივილი და რასაც არ მოჰყოლია საქართველოს სისხლის სამართლის კოდექსის 117-ე, 118-ე ან 120-ე მუხლებით გათვალისწინებული შედეგი, ჩადენილი არასრულწლოვნის თანდასწრებით, მისივე ოჯახის წევრის მიმართ; ასევე – ოჯახის ერთი წევრის მიერ მეორის მიმართ ძალადობა, რამაც გამოიწვია ფიზიკური ტკივილი და რასაც არ მოჰყოლია საქართველოს სისხლის სამართლის კოდექსის 117-ე, 118-ე ან 120-ე მუხლებით გათვალისწინებული შედეგი, ჩადენილი წინასწარი შეცნობით არასრულწლოვნის მიმართ. აღნიშნული ქმედებები გამოიხატა შემდეგში:

- 2017 წლის 30 ოქტომბერს, დაახლოებით 17:00 საათზე, კ---ის რაიონის სოფელ ა----- მდებარე თავის საცხოვრებელ სახლში ზ----- ს-----მა არასრულწლოვანი შვილის – გ----- ს-----ის თანდასწრებით, შელაპარაკების ნიადაგზე მეუღლეს – ნ---- კ-----ს მარცხენა ლოყაში ერთხელ დაარტყა ხელი, რის შედეგადაც ნ---- კ-----მა განიცადა ფიზიკური ტკივილი.

2017 წლის 20 ნოემბერს, დაახლოებით 09:00 საათზე, კ---ის რაიონის სოფელ ა----- მდებარე თავის საცხოვრებელ სახლში ზ----- ს-----მა შელაპარაკების ნიადაგზე არასრულწლოვან შვილს – გ----- ს-----ს დანით მარჯვენა მკლავში მიაყენა ერთი ჭრილობა, რის შედეგადაც გ----- ს-----მა განიცადა ფიზიკური ტკივილი.

3. გორის რაიონული სასამართლოს 2018 წლის 23 მაისის განაჩენი თბილისის სააპელაციო სასამართლოს სისხლის სამართლის საქმეთა პალატის 2018 წლის 7 სექტემბრის განაჩენით შეიცვალა: ზ----- ს-----ი ცნობილ იქნა უდანაშაულოდ და გამართლდა საქართველოს სსკ-ის 126¹-ე მუხლის მე-2 ნაწილის „ბ“ ქვეპუნქტით (2018 წლის 1 იანვრამდე მოქმედი რედაქცია) წარდგენილ ბრალდებაში; მასვე საქართველოს სსკ-ის 126¹-ე მუხლის მე-2 ნაწილის „ა“ ქვეპუნქტით (2018 წლის 1 იანვრამდე მოქმედი რედაქცია) მიესაჯა 1 წლით თავისუფლების აღკვეთა. განაჩენი სხვა ნაწილში დარჩა უცვლელად.

4. თბილისის სააპელაციო სასამართლოს სისხლის სამართლის საქმეთა პალატის განაჩენი საკასაციო წესით გაასაჩივრა დაცვის მხარემ. წარმოდგენილი საკასაციო საჩივრით ადვოკატი ქ----- გ-----ი ითხოვს ზ----- ს-----ის მიმართ თბილისის სააპელაციო სასამართლოს 2018 წლის 7 სექტემბრის განაჩენის გაუქმებას და გამამართლებელი განაჩენის გამოტანას იმ მოტივით, რომ ვერ დადგინდა, დაზარალებულმა გ----- ს-----მა რა ვითარებაში მიიღო დაზიანება და მასზე ფიზიკურად იძალადა თუ არა ზ----- ს-----მა, რადგან გ----- ს-----მა უარი თქვა ჩვენების მიცემაზე, სხვა პირდაპირი მტკიცებულება კი საქმეში არ არსებობს.

5. გორის რაიონული პროკურატურის პროკურორი ნათია კიკალია

შესაგებლით ითხოვს ადვოკატ ქ----- გ-----ის საკასაციო საჩივრის დაუშვებლად ცნობას.

6. საკასაციო პალატამ შეისწავლა საკასაციო საჩივარი და დაასკვნა, რომ იგი არ აკმაყოფილებს საქართველოს სსსკ-ის 303-ე მუხლის მე-3 ნაწილით გათვალისწინებულ მოთხოვნებს, რის გამოც არ უნდა იქნეს დაშვებული განსახილველად, კერძოდ: საქართველოს სისხლის სამართლის საპროცესო კოდექსის 303-ე მუხლის მე-3 ნაწილი ამომწურავად იძლევა იმ საფუძველთა ჩამონათვალს, რომელთა არსებობის შემთხვევაში საკასაციო საჩივარი დასაშვებად ჩაითვლება, ასეთებია:

ა) საქმე მოიცავს სამართლებრივ პრობლემას, რომლის გადაწყვეტაც ხელს შეუწყობს სამართლის განვითარებასა და ერთგვაროვანი სასამართლო პრაქტიკის ჩამოყალიბებას;

ბ) საქართველოს უზენაეს სასამართლოს მანამდე მსგავს სამართლებრივ საკითხზე გადაწყვეტილება არ მიუღია;

გ) საკასაციო საჩივრის განხილვის შედეგად მოცემულ საქმეზე სავარაუდოა მსგავს სამართლებრივ საკითხზე საქართველოს უზენაესი სასამართლოს მანამდე არსებული პრაქტიკისაგან განსხვავებული გადაწყვეტილების მიღება;

დ) სააპელაციო სასამართლოს გადაწყვეტილება განსხვავდება მსგავს სამართლებრივ საკითხზე საქართველოს უზენაესი სასამართლოს მანამდე არსებული პრაქტიკისაგან;

ე) სააპელაციო სასამართლომ საქმე განიხილა მატერიალური ან/და საპროცესო სამართლის ნორმების მნიშვნელოვანი დარღვევით, რასაც შეეძლო არსებითად ემოქმედა საქმის განხილვის შედეგზე;

ვ) სააპელაციო სასამართლოს გადაწყვეტილება ეწინააღმდეგება მსგავს სამართლებრივ საკითხზე ადამიანის უფლებათა და ძირითად თავისუფლებათა დაცვის კონვენციას და ადამიანის უფლებათა ევროპული სასამართლოს პრეცედენტულ სამართალს;

ზ) კასატორი არასრულწლოვანი მსჯავრდებულია.

7. საკასაციო პალატას მიაჩნია, რომ მოცემულ სისხლის სამართლის საქმეში არ მოიპოვება არცერთი ზემოაღნიშნული საფუძველი. პალატა აღნიშნავს, რომ დაცვის მხარის საკასაციო საჩივარი უსაფუძვლოა, ვინაიდან მსჯავრდებულ ზ----- ს-----ის ბრალეულობა უტყუარადაა დადასტურებული საქმეზე შეკრებილი, როგორც სასამართლო სხდომაზე გამოკვლეული, ისე – მხარეთა მიერ უდავოდ ცნობილი მტკიცებულებებით, კერძოდ: მიუხედავად იმისა, რომ დაზარალებულმა გ----- ს-----მა ისარგებლა საქართველოს სსსკ-ის 49-ე მუხლის 1-ლი ნაწილის „დ“ ქვეპუნქტით მოწმისათვის გარანტირებული უფლებით და ახლო ნათესავის (მამის) საწინააღმდეგოდ სასამართლოში არ მისცა ჩვენება, ზ----- ს-----ის მიერ საქართველოს სსსკ-ის 126¹-ე მუხლის მე-2 ნაწილის „ა“ ქვეპუნქტით

გათვალისწინებული დანაშაულის ჩადენა დადასტურებულია მოწმეების – ნ-
--- კ-----ის, ნ----- კ-----ის, ლია ნ-----ის ჩვენებებით, პ----- ჯ-----ის,
ქ----- ბ-----ს, თ----- ს-----ის, ნ--- ლ-----ის დაკითხვის ოქმებით,
გ----- ს-----ის ტანსაცმლის დათვალიერებისა და ამოღების 2017 წლის 20
ნოემბრის ოქმით, სასამართლო-სამედიცინო ექსპერტიზის 2017 წლის 24
ნოემბრის №----- დასკვნით, კრიმინალისტიკური ექსპერტიზის 2017 წლის
29 ნოემბრის №----- და ტრასოლოგიური ექსპერტიზის 2018 წლის 2
თებერვლის №----- დასკვნებით, ნ--- კ-----ის საცხოვრებელი სახლის
დათვალიერების ოქმითა და სხვა მტკიცებულებებით.

8. ყოველივე ზემოაღნიშნულიდან გამომდინარე, ვინაიდან მოცემულ
შემთხვევაში არ იკვეთება საქართველოს სსსკ-ის 303-ე მუხლის მე-3 და მე-3¹
ნაწილებით გათვალისწინებული გარემოებები, საკასაციო პალატას მიაჩნია,
რომ საკასაციო საჩივარი დაუშვებლად უნდა იქნეს ცნობილი.

9. საქართველოს სსსკ-ის 303-ე მუხლის მე-3, მე-3², მე-3³, მე-4 ნაწილების
შესაბამისად, საკასაციო პალატამ

და ა დ გ ი ნ ა :

1. მსჯავრდებულ ზ----- ს-----ის ინტერესების დამცველის, ადვოკატ ქ-----
გ-----ის საკასაციო საჩივარი არ იქნეს დაშვებული განსახილველად.

2. განჩინება საბოლოოა და არ საჩივრდება.

თავმჯდომარე

ბ.

შავლიაშვილი

მოსამართლეები:

ბ. ალავიძე

პ. ქათამაძე